

BATAKURU PUULUSA HAA E BE KOLOOSI BEN

¹ Immorde e an min Puulusa, mo Alla hoddiri wonugol *sahaabaajo Iisaa Almasiihu on, wonderdude e oo musidso men wi'eteedo Timotee, ² haa e mon onon, bee musibbe amen humondirbe e *Almasiihu on, gomdinbe wonbe Koloosi, sellafindeebe. Yo moyyere e buttu wonan on immorde e Alla Baaba men.

Fii no Puulusa Jarniri Alla

³ Meden duumi e jarnugol Alla, on Ben Iisaa Almasiihu Joomi men on, e nder ko men torantoo on kon. ⁴ Ko fii men nanii fii ko gomdinfon Iisaa Almasiihu on kon no wowlee, e giggol ngol yidufodon yimbe Alla ben fow ngol, ⁵ sabu tama'u mo maranadon on ka kammu, on mo daaluyee goongaajo on andinnoo on fii mun, d'un ko Kibaaru Moyyo ⁶ hewtudo ka mon on. Ko wano o woni wadirde batte, o laya e aduna on fow non, ko wano non o woni wadirde batte e hakkunde mon gila pande nanudon andudon moyyere Alla nden e nder goonga on, ⁷ bawto Epafaraasi, oo gido amen e gollidoowo e amen, hewtinde on dii janndeeji. Himo wonani on golloowo sella-finneejo e telen-ma Almasiihu on, ⁸ awa kadi o banginanii men fii giggol ngol Ruuhu Allaahu on wadi e mon ngol. ⁹ Ko d'un wadi, menen kadi, gila pande men humpitii d'un, meden duumii e toranagol on Alla, e toragol yo on hebbine gandal fii faale makko

on, wondude e kala faamu e hakkil iwrudun e Ruuhu Allaahu on, ¹⁰ fii no wuuriron noone no hawrirani Joomiraado on, e no welira mo e kala noone, ngurndan mon d'an rima kala noone kuude moyye, beydodon e andugol Alla, ¹¹ bawgal mangu makko ngun tiifina on e kala huunde, fii no woniron ḥajjiibe e muṇṇiibe, ¹² e hoore hidon jarnira Baabaaajo on weltaare, on Wawnudo on hebugol gebal ka ndondi ndi o marani gomdinbe ben ka laamateeri ndaygu, ¹³ on Jattindo en mbawdi nibe ḫen,a o addii en ka laamateeri Bidso makko yidaado on, ¹⁴ on mo hebiriden cottudi wonkii e yaafuyee junuubaaji.

Fii Bural Iisaa ngal

¹⁵ Ko on Bidso woni mbaadi Alla mo yi'otaako on, ko kanko woni afo e hoore kala ko tagaa. ¹⁶ Ko fii ko e makko kala huunde tagiraa ka kammu e ka hoore leydi, ko yi'otoo e ko yi'otaako, dun ko julle laamu e laamuji e hooreyaagal e bawde, fow ko e makko tagiraa, e fii makko kadi tagiraa. ¹⁷ Ko kanko adii kala huunde, e kala huunde ko e makko woniri. ¹⁸ Ko kanko woni hoore bandu ndun, d'un ko *moftal ngal. Ko kanko woni Fuddoode nden, e adaado immintineede e hakkunde maybe ben, fii no o wonira Arano e di fow. ¹⁹ Ko fii welii Alla ka ko woni e Alla kon fow wona e Almasiihu on, ²⁰ e moyyintinirgol fow e makko kanko tigi, ko woni ka hoore leydi kon e ko woni ka kammu kon, e nder wadugol buttu rewrude e yiyan

a **1:13** 1.13 «Mbawdi nibe ḫen» d'un ko doole bone on.

makko hibbaadan dan ka hoore *leggal makko altindiraangal.

²¹ Onon kadi, bee woddfitinoobe Alla e aybe makko sabu mijooji mon din e kuude mon bonde oen, ²² jooni non ko mayde bandu makko ndun o moyyintiniri hakkunde mon e makko, fii no laatoron yeeso makko kanko Alla laabube, be aldaa e ella e be felnaaki, ²³ kono non, ko si tawii hidon duumii e gomdfinal ngal, hidon tabintinaa, niibinaa e maggal, hara on woddfaaki tama'u mo hebirdon Kibaaru Mooyo mo nanudon on. On Kibaaru fejninanadao kala tagaado ka ley kammu, ko on min Puulusa mi wonti kurkaadu mun.

Fii no Puulusa Yangorani Moftal ngal

²⁴ Jooni mido weltii e nder tampereeji an din fii mon. Ko fii, e an min, mi timminirii bandu an ndun ko njakkunoo e tampereeji Almasiihu on, fii bandu makko ndun, ndun-le ko moftal ngal. ²⁵ Ko ngal moftal mi wonani kurkaadu, wano Alla nelirimmi non fii fejninanangol on daaluyee makko on e ko woni e mun kon fow, ²⁶ dfun ko on gundoo neebunoodo suudaade e nder jamaanu-iji din fow, kono jooni o fejninananaama laabube makko ben, ²⁷ ben be Alla faalaa andinde ko hondun woni ngalu mangu on gundoo e hakkunde leyyi din fow. Ko woni on gundoo: Almasiihu on no e mon, ko dun woni tama'u mangu ngun. ²⁸ Ko on men woni fejninde fii mun e nder hajagol, janna kala neddo e dow faamu timmungu, fii no kala neddo laatora mokobaa e nder humondiral e Almasiihu on.

29 Ko d^un mi woni gollande, e n^der tippircgol e doole makko wonde gollude e an no tiifiri d^en.

2

1 Awa, mi faalaa yo on andu ko tippiro hongo mi rondii fii mon, onon e bee be Laa'udiisa e be yi'aali lan haa hande ben. **2** Dun ko fii no berde ma^bbe d^en wakkilora, e no be tamondirira e n^der giggol, be heba kala ko woni e pellital heewungal iwrungal e faamu, fii andugol gundoo Alla on, d^un ko *Almasiihu on tigi, **3** on mo ngaluuji faamu ngun e gandal ngal fow suudfi e mun. **4** Ko mi wi'iri d^un, ko fii wota hay gooto faljinir on yewtereeji weldfi. **5** Ko fii, si tawii mi tawdaaka e mon e bandu, kono haray mido wondi e mon ka bernde, mido weltori yi'ugol nanondiral yaadungal wongal hakkunde mon ngal, e tiifeendi gomdfinal mon ngal e telen-ma Almasiihu on.

Fii Hebirgol Almasiihu on Ngurndan Heewudan

6 Nde tawnoo on jabii lisa Almasiihu on wona Joomi mon, awa duumee e humagol e makko. **7** Iree dadi mon din e didoodi mon ndin e makko, tabiton e n^der gomdfinal ngal wano janniradfon non, wonon heewube jarnugol.

8 Reenee, wota hay gooto e mon hiile, nangiree faamu neddanke e dayni meereeji immorde e aadaaji neddanke e mbawdiji adunayankeeji, di tawata wonaa e Almasiihu on iwri. **9** Ko fii allankaaku Alla ngun fow no e neddfankaaku Almasiihu on, **10** awa kadi on wonii timmu^be e kala huunde e n^der yubbondiral mon e makko, d^un

ko on Wondo yeesoojo kala laamu e kala bawgal. **11** Ko e nder humondiral mon e makko kadi sunniniradon *sunninannde nde wadiraaka juude nedfsanke, kono hara ko sunninannde nde Almasiihu on wadi nden, d'un ko boorugol bandu junuubankeeru ndun. **12** On surridaama e makko, e nder *looteede maande kisiyee, on immintinidaama e makko sabu ko gomdindon bawgal Alla ngal kon, on Immintindo mo e hakkunde maybe ñen. **13** Onon, be tawata maayiino sabu bonnereeji mon e sabu angal sunninegol mon, kanko Alla o wurnitidii on e Almasiihu on. O yaafanike en bonnereeji men din fow. **14** O montii derol namaale windanoongol e hoore men ngol, ngol ngol tawata yamirooje mun no njannani en, o ittiri ngol fempugol ngol ka *leggal altindiraangal. **15** O boorii laamuji din e bawde den, o weebitii de e kene e yeeso fow e nder foolirgol de leggal altindiraangal ngal.

16 Awa ko d'un wadi, wota gooto naawu on ffi ko jaamoton kon e ko yaroton kon, maa ffi juldeere, maa lewru heyru, maa nalaade fowteteede e mun den. **17** Dun fow ko dowdi piiji aroyaydfi din, kono haqqiqa on ko di Almasiihu on din. **18** Wota on jabu ben yimbe yidube yankinorde tampingol bandu ndun e rewugol malaa'ika hippoo on mbuunaari mon ndin. Sifa ben yimbe ko hoolorbe koydfi mun. Hibe hebbinora mawnintinaare nde alaa nafa, immorde e mijjooji nedfsanke, **19** edii be humaade e Hooreejo on, on mo bandu ndun fow jogondiriri sabu mun, fottiri jokke den e dadfi din, mawni no Alla yidsiri non.

Fii Wuurugol e nder Humondiral e Almasiihu on

²⁰ Nde tawnoo on maayidiino e Almasiihu on, on sertii e dii mbawdiji adunayankeeji, ko hondun jabanton be fawa on dii aadaaji, wa si tawii hidon wuurani aduna, ²¹ dfun ko «wota a meemu d'undsoo!», «wota a mettu d'undsa!», «wota a foppo d'untsoo!» ²² Dii aadaaji fow si huutoramaa ko di bontaydfi, bay ko di yamirooje e janndeeji neddanke. ²³ Pellet, ko goonga, din aadaaji no nandi e faamu, bay hidfi catii e dewal anniyaangal immorde e neddanke, e yankinaare e yangugol bandu, kono di alanaa neddanke no o wawtora hoore makko.

3

Fii Booragol Kuude Bonde den, Bornoo Kuude Moyye den

¹ Bay non on wurnitidaama e *Almasiihu on, haray dabbee piiji wondi ka dow din, ka Almasiihu on joodori ka sengo jaamo Alla ton. ² Mijee fii ko woni ka dow kon, hara hinaa fii ko woni ka hoore leydi kon. ³ Ko fii on maayii, ngurndan mon dan no suudii e Almasiihu on ka Alla. ⁴ Awa, nde Almasiihu on, dfun ko ngurndan mon d'an, feepiti, haray on feejiday e makko ka mangural.

⁵ Awa waree piiji adunayankeeji wondi e mon din, dfun ko wano: jinaa e angal laabali e himmeeji e faaleeji bondi e miile, (ko fii miile ko rewugol sanamu). ⁶ Ko dfun addata tikkere Alla nden e hoore murtube ben. ⁷ Ko nii wuuirnodon oya tuma, wa fewndo junuubu

ardinoo ngurndan mon dan. ⁸ Kono jooni non, onon kadi bugitee dfun fow: dfun ko tikkere nden e monee on e hunyeendi ndin e hoyre nden e haalaaji bondi yaltaynoodi e kundule mon din. ⁹ Wota on fenindiran, onon bee bortiibe tagu hinngu ngun e kuude mun, ¹⁰ bornii tagu hesu heydintinaangu e noone mbaadi on Tagudo ngu, fii no waawiron mo andude haa timma. ¹¹ Don alaaa *Gereekiyankeejo maa *Yahuudiyankeejeejo, maa sunninaado maa mo sunninaaka, maa lenol ngol finaa maa lenol kaana-jikkuwol, maa maccudo maa dimo, kono ko Almasiihu on woni fow, woni e fow.

¹² Bay ko on subaabé Alla, laabube, e yidaabe makko, bornee yurmeende tiifunde e moyyuki e yankinaare e newaare e yondinaare. ¹³ Mijnondiranee, yaafondiron si tawii godso no mari ko wullitoo e hoore oya. Wano Almasiihu on yaaforani on non, onon kadi wadiree wano non. ¹⁴ Kono, e hoore dundoo fow, bornee giggol, sabu ko ngol yubbindirta haa timma. ¹⁵ Yo buttu Almasiihu ngu noddiradon fii wonugol bandu wooturu ngun ardo berde mon den. Wonee anditanoobe. ¹⁶ Yo kongol Almasiihu on hebbin berde mon den. Jannindiree, hajondiron e dow faamu fow e nder ko beytiranton Alla beyti Zabuura e jaarooke e beyti hormordi, yettiron Alla beytirangol mo berde mon den fow. ¹⁷ Kala ko wadoton, e kongol maa e kuugal, wadfee fow e innde Iisaa Joomi on, e jarnirgol mo Alla Baabaajo on.

Fii no Beynguure Almasiyyaabe Haani

Wonirde

¹⁸ Rewbe, mo kala e mon, yo yankinano moodi mun, wano hawrirani Joomiraado on non.
¹⁹ Onon kadi worbe, mo kala e mon yo yidu beyngu mun, hara on hunyanaali be.

²⁰ Onon kadi faybe, doftee mawbe mon ben e di fow, ko fii dun no wela Joomiraado on.
²¹ Onon kadi baabiraabe, wota on mettin berde faybe mon ben, fii wota berde mabbe maayu.

²² Onon kadi yo jiyaabe, doftee jeybe on jeyal adunayankewal ben e di fow, hara hinaa non e gite mabbe tun, wa si tawii on dabbay woni no yimbe ben yidira on, kono hara ko bernde laabunde e nder kulol Joomiraado on. ²³ Kala ko wadoton, wadfiree dun ittiri wonkii mon kin fow, wa si tawii ko Joomiraado on wondon wadande, hara hinaa yimbe ben, ²⁴ e hoore andugol mon on hebiray Joomiraado on ndondi wa ngeenaari. Ko Almasiihu Joomi on wondon kurkanaade. ²⁵ Ko fii kala on wadudo ko boni, o hettay njoddi bonnere makko nden, awa kadi gidaale alaa ton.

4

¹ Onon kadi yo jeybe, jogoree jiyaabe mon ben no feewiri e no nundiri, e hoore andugol wonde onon kadi hidon mari Jeydo on ka kammu.

Fii Waajuuji Puulusa Goo

² Duumee e toragol Alla, hakkilanon e dun e dow yettugol mo. ³ Toranodon men kadi, fii yo Alla udditan kongudi amen din dambugal fii no men waawira fejnininerde goonga luggudo *Almasiihu on, on goonga mo mi jolkaa fii mun,

⁴ e no mi yewtira fii on goonga no laabiri, wano haaniranimmi non. ⁵ E telen-ma be gomdfinaa ben, wondiree faamu, hara on accaal'i fajuhun woo feyyira on. ⁶ Yo taw soono woo kongudi mon din ko weldi, hara hid'i weliri wa landan, fii no andiron ko honno jaabortion mo kala.

Fii Rawnoode nden e Salminaango ngon

⁷ Tikiiki, oo musiddo an yidaado, golloowo holniido mo mi kurkodata fii golle Joomiraado on, o andinoyay on fow fii no mi fewndori. ⁸ Ko wadi si mi immini mo haa e mon, ko fii no andiron no men fewndori, e fii yo o wakkilin berde mon d'en. ⁹ Mi immindinanii on mo e oo musidfo yidaado sella-findeejo wi'eteedo Onesiima, on ko mo mon. Be andinoyay on ko woni feyyude gaa kon fow.

¹⁰ Oo wondiddo an e joge wi'eteedo Aristarke salminii on, wondude e Markuusa, oo dendiraawo Barnabaasi, on mo tindinanadon fii mun. Si o hewtoyii ka mon, wernee mo moyya. ¹¹ Iisaa jammaado Yustuusa kadi salminii on. E nder lejol *Yahuuda ngol, ko bee doo tun woni gollitude e an fii *laamateeri Alla ndin, be woni wakkilinbe lan. ¹² Oo kurkaadu Iisaa Almasiihu on wi'eteedo Epafaraasi salminii on, on ko mo mon. Himo duumii e tippiro fii mon e nder torndeeji makko din, fii no tabitiron wa mokobaabe, heewube hoolaare e telen-ma faale Alla on fow. ¹³ Mido seeditanii mo d'un, wonde o yanganike on fota, e fii bee be Laa'udiisa e fii bee be Hiirapolisa.

¹⁴ Awa kadi, oo jawndoovo yidaado wi'eteedo Luuka, wondude e Demaasi, salminii on.

¹⁵ Salminanee lan musibbe wonbe Laa'udiisa ben, kapun e oo debbo wi'eteedo Nimfaasi, e *moftal wongal ka suudu makko ngal. ¹⁶ Si nduu batakuru jangaama ka mon, etee kadi no ndu jangiree ka moftal wongal Laa'udiisa. Jangon kadi iwranayndu on ndun Laa'udiisa. ¹⁷ Wi'on kadi oo wi'eteedo Arkiipe yo o eto no o timminira dee golle de o hebiri Joomiraado on.

¹⁸ Min Puulusa, mi salminirii on jungo an ngon tigi. Awa anditee fii jolokooje an d'en. Yo moyyere wonan on.

**Version Pular Fuuta-Jallon
The New Testament in the Fouta-Jallon Pular
language of Guinea**

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact wab.admin@pbt.org.

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6